

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱԶԳԱՅԻՆ ԺՈՂՈՎԻ ՆԱԽԱԳԱՀ
պարոն ՀՈՎԻԿ ԱԲՐԱՀԱՄՅԱՆԻՆ

Հարգելի պարոն Աբրահամյան

Ձեզ ենք ներկայացնում Հայաստանի Հանրապետության կառավարության եզրակացու-
թյունը Հայաստանի Հանրապետության Ազգային ժողովի պատգամավոր Արմեն Մար-
տիրոսյանի՝ օրենսդրական նախաձեռնության կարգով ներկայացրած «Ավտոմոբիլային
տրանսպորտի մասին» Հայաստանի Հանրապետության օրենքում լրացում կատարելու
մասին» Հայաստանի Հանրապետության օրենքի նախագծի վերաբերյալ:

1. 1-ին հոդվածի՝

1) 5-րդ կետով սահմանված դրույթը կարգավորված է Հայաստանի Հանրապետու-
թյան կառավարության 2007 թվականի մարտի 22-ի N 655-Ն որոշմամբ հաստատված կար-
գի 22-րդ կետով: Տաքսամոտորային փոխադրումներում ներգրավված տրանսպորտային
միջոցների համար նախագծով առաջարկվող առավելագույն 15 տարի ժամկետի սահմանումը
կառաջացնի էժան և տեխնիկապես ոչ բավարար վիճակում գտնվող տրանսպորտային
միջոցների հոսք դեպի Հայաստանի Հանրապետություն, որի արդյունքում կունենանք տեխնի-
կապես մաշված տաքսամոտորային պարկ:

Հայաստանի Հանրապետության կառավարության՝ նշված որոշմամբ նախատեսված
սահմանափակումները՝ տաքսամոտորային փոխադրումներում 10 և ավելի պակաս տարիք
ունեցող ավտոմոբիլների ներգրավումը, սահմանվել է՝ հաշվի առնելով ուղևորների սպասարկ-
ման անվտանգությունը, սպառողների իրավունքների պաշտպանությունը, ծառայությունների
որակի բարձրացումը և միջազգային փորձը:

2) 6-րդ կետով սահմանված դրույթը կարգավորված է Հայաստանի Հանրապետու-
թյան կառավարության 2007 թվականի մարտի 22-ի N 655-Ն որոշմամբ հաստատված կարգի 14-
րդ կետով: Նպատակահարմար չենք գտնում մարդատար-տաքսի ավտոմոբիլներով
ուղևորափոխադրումների համար նախատեսված տրանսպորտային միջոցներին հիմնական

համարանիշեր հատկացնելը: Հարկ ենք համարում նշել, որ հանրապետությունում ներկայումս գործում են լիցենզավորված՝ մարդատար-տաքսի ծառայություն իրականացնող **532** կազմակերպություն և **52** անհատ, ընդգրկված է, ընդհանուր առմամբ, դեղին հիմնագույնի համարանիշերով **5825** տրանսպորտային միջոց, որի արդյունքում Հայաստանի Հանրապետության պետական բյուջե է փոխանցվել **107.7** մլն դրամ:

Ինչ վերաբերում է հիմնավորման մեջ նշված մարդատար-տաքսի ավտոմոբիլներով Հայաստանի Հանրապետության սահմաններից դուրս ուղևորափոխադրումների ծառայությունների մատուցման հնարավորությանը, հայտնում ենք, որ Հայաստանի Հանրապետության տրանսպորտի և կապի նախարարությունը ներկայումս Վրաստանի համապատասխան մարմինների հետ բանակցություններ է վարում դեղին հիմնագույնի համարանիշերով թեթև մարդատար-տաքսի ավտոմոբիլների՝ Վրաստան մուտքը թույլատրելու համար:

3) 7-րդ կետի վերաբերյալ հայտնում ենք, որ «Ճանապարհային երթևեկության անվտանգության ապահովման մասին» Հայաստանի Հանրապետության օրենքի **15-րդ** հոդվածի **6-րդ** կետի համաձայն, ավտոմոբիլի դիմապակու վրա՝ Հայաստանի Հանրապետության կառավարության որոշմամբ նախատեսված տեղում պետք է փակցվի տեխնիկական զննության կտրոնը: Դիմապակու վրա այլ փաստաթղթեր փակցնելը կսահմանափակի վարորդի տեսադաշտը և չի ապահովի անհրաժեշտ անվտանգությունը:

2. Իրավական առումով 1-ին հոդվածում՝

1) առաջին պարբերությունում «ՀՕ-233» համարն անհրաժեշտ է փոխարինել «ՀՕ-233-Ն» համարով, իսկ «կետերով» բառը՝ «մասերով» բառով:

2) լրացվող 7-րդ մասում հստակեցման կարիք ունի, թե ինչ հատուկ կտրոնի մասին է խոսքը: Ըստ նախագծին կից հիմնավորման՝ Հայաստանի Հանրապետության կառավարության սահմանած կարգով կտրամադրվի դիմապակուն փակցվող հատուկ կտրոն: Այդ առումով լրացվող մասում անհրաժեշտ է կատարել համապատասխան նշում:

Ելնելով նշվածից՝ Հայաստանի Հանրապետության կառավարությունը դեմ է ներկայացված նախագծի ընդունմանը:

Միաժամանակ հայտնում ենք, որ ներկայացված օրենքի նախագիծը Հայաստանի Հանրապետության Ազգային ժողովում քննարկելիս՝ հարակից զեկուցմամբ հանդես կգա Հայաստանի Հանրապետության տրանսպորտի և կապի նախարար Գուրգեն Սարգսյանը:

Հարգանքով՝

ՏԻԳՐԱՆ ՍԱՐԳՍՅԱՆ

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԸ****«Ավտոմոբիլային տրանսպորտի մասին» Հայաստանի Հանրապետության օրենքում
լրացում կատարելու մասին**

Հոդված 1. «Ավտոմոբիլային տրանսպորտի մասին» Հայաստանի Հանրապետության օրենքի (5 դեկտեմբերի 2006 թվականի, ՀՕ-233, այսուհետ՝ օրենք) 17-րդ հոդվածը լրացնել 5, 6 եւ 7 կետերով՝ հետեւյալ բովանդակությամբ.

5. Տաքսամոտորային փոխադրումներում կարող են ներգրավվել միայն տասնհինգ եւ ավելի փոքր տարիք ունեցող ավտոմոբիլներ:

6. Մարդատար-տաքսի ավտոմոբիլներով ուղեւորափոխադրումների համար նախատեսված տրանսպորտային միջոցներին հատկացվում են հիմնական համարանիշներ:

7. Մարդատար-տաքսի ավտոմոբիլներով ուղեւորափոխադրումներ իրականացնող լիցենզավորված անձանց յուրաքանչյուր ավտոմոբիլի համար տրվում է դիմապակու փակցման հատուկ կտրոն:

Հոդված 2. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը:

ՀԻՄՆԱՎՈՐՈՒՄ**«ԱՎՏՈՍՈՌԲԻԼԱՅԻՆ ՏՐԱՆՍՊՈՐՏԻ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՕՐԵՆՔԻ ՎԵՐԱԲԵՐՅԱԼ**

Նախագծի ընդունումը պայմանավորված է ֆիզիկական եւ իրավաբանական անձանց կողմից մարդատար-տաքսի ավտոմոբիլներով ուղեւորափոխադրումներ իրականացնող շուրջ 3000 աշխատատեղերի պահպանման անհրաժեշտությամբ եւ ձեռնարկ վարչարարությամբ, եկամտաստեղծ գործունեությունը չսահմանափակելու հիմնարար սկզբունքի ամբողջական իրականացմամբ: Հայաստանի Հանրապետության փոքր եւ միջին գործարարության ոլորտում անհրաժեշտություն է առաջացել վերականգնել տնտեսական մրցակցության հավասարության սկզբունքը, մասնավորապես՝ մարդատար-տաքսի ավտոմոբիլներով նախատեսված Հայաստանի Հանրապետության սահմաններից դուրս ուղեւորափոխադրումների ծառայությունների մատուցման հնարավորությունը: Նախագիծը նպատակ ունի կարգավորել մարդատար-տաքսի ավտոմոբիլներով ուղեւորափոխադրումներ իրականացնող ֆիզիկական եւ իրավաբանական անձանց լիցենզավորման կարգը, ըստ որի՝ Հայաստանի Հանրապետության կառավարության կողմից սահմանված կարգով կտրամադրվի դիմապակու փակցման հատուկ կտրոն:

Օրինագծի ընդունումը էապես կնպաստի նշված գործունեություն իրականացնող անձանց եւ նրանց ընտանիքների սոցիալական ապահովման խնդիրների լուծմանը՝ ներկա ֆինանսատնտեսական ճգնաժամի պայմաններում: